



REPUBLIKA E SHQIPËRISË
AUTORITETI I KONKURENCËS
KOMISIONI KONKURENCËS

Nr. 464/prot.
11

Tiranë, më 16.11.2021

VENDIM

Nr. 846, Datë 16.11.2021

“ MBI AUTORIZIMIN E PËRFTIMIT TË KONTROLLIT TË SHOQËRISË
ALBCHROME HOLDING SHPK DHE FILIALEVE TË SAJ NGA SHOQËRIA YILDIRIM
INTERNATIONAL MINING INVESTMENTS B.V.”

Komisioni i Konkurrencës me pjesëmarrjen e:

Znj. Juliana LATIFI	Kryetar
Znj. Leida MATJA	Zv/Kryetar
Znj. Rezana KONOMI	Anëtar
Znj. Adriana BERBERI	Anëtar
Z. Denar BIBA	Anëtar

Në mbledhjen e tij të datës 16.11 . 2021, shqyrtoi çështjen me:

Objekti: Autorizimi i përqendrimit të realizuar nëpërmjet përfimit të kontrollit të shoqërisë Albchrome Holding SHPK dhe filialeve të saj nga shoqëria Yildirim International Mining Investments B.V.

Baza Ligjore: Nenet 2, 10-12, neni 24, germa d, dhe nenet 53-64 të ligjit nr. 9121, datë 28.07.2003 “Për mbrojtjen e konkurrencës”, i ndryshuar; Rregullorja “Për zbatimin e procedurave të përqendrimit të ndërmarrjeve”; Udhëzimi “Për formën e njoftimit të përqendrimit” dhe Formulari i njoftimit të përqendrimit.

Komisioni i Konkurrencës, pas shqyrtimit të relacionit të Sekretarit të Përgjithshëm si dhe raportit të Drejtorisë së Analizës dhe Metodologjisë së Tregjeve, mbi njoftimin e përqendrimit të realizuar nëpërmjet përfimit të kontrollit të shoqërisë Albchrome Holding SHPK dhe filialeve të saj nga shoqëria Yildirim International Mining Investments B.V.

VËREN SE :

Transaksioni dhe procedura

Pranë Autoritetit të Konkurrencës, është depozituar njoftimi mbi përfimin e kontrollit të shoqërisë Albchrome Holding SHPK dhe filialeve të saj nga shoqëria Yildirim International Mining Investments B.V.

Referuar dokumentit “Marrëveshje për blerje aksionesh”, palët janë:

Pala blerëse: Yildirim International Mining Investments B.V. është një shoqëri me përgjegjësi të kufizuar, e themeluar sipas ligjeve të Hollandës. Yildirim BV është themeluar si një Ndërmarrje me Qëllim të Veçantë dhe kryen aktivitet tregtar si një shoqëri holding. Yildirim BV zotërohet në mënyrë indirekte nga Yildirim International Investments Holding B.V., pjesë e Grupit Yildirim.

Grupi Yildirim operon në një numër të madh industrish si: metalurgji dhe miniera, qymyre dhe koks, energji, plehra kimike/fertilizues dhe kimikate, menaxhim porti, transport, logjistik etj.

Grupi Yildirim nuk është aktiv dhe nuk realizon të ardhura në Shqipëri.

Pala shitëse: Balfin - Balkan Finance Investment Group SHPK, është një shoqëri me përgjegjësi të kufizuar, e themeluar sipas legjislacionit shqiptar, me objekt të veprimtarisë: investimi në instrumente financiare; investime në pasuri të paluajtshme dhe në asete (të prekshme apo të paprekshme), ofrimi i shërbimeve të konsulencës për shoqëritë e kontrolluara prej saj dhe/ose të tretë në përputhje me legjislacionin e zbatueshëm në territorin e Republikës së Shqipërisë dhe jashtë saj. Gjithashtu, shoqëria mund të kryejë çdo veprim, operacion apo transaksion tjetër komercial, industrial e financiar, të dobishëm apo plotësues ndaj përmbushjes së objektit të shoqërisë, me kusht që aktivitetet e mësipërme të mos jenë në kundërshtim dhe të mos alternojnë objektin parësor të veprimtarisë së shoqërisë.

Target: Albchrome Holding SHPK është një shoqëri me përgjegjësi të kufizuar, e themeluar sipas legjislacionit shqiptar, me objekt aktiviteti: menaxhimi, aktivitetet mbështetëse për industrinë e minierave, shërbimet për mineralet jo-metalike etj. Shoqëria zotërohet tërësisht nga Balkan Finance Investment Group SHPK.

Albchrome Holding SHPK është e angazhuar në biznesin e kontrollit të interesit në kapitalin e dy Filialeve, të cilat i zotëron plotësisht:

Albchrome SHPK, është prodhuesi më i madh i kromit dhe ferrokromit në Shqipëri, i cili operon nëpërmjet dy kontratave të koncesionit; atë të ndërtimit, operimit dhe transferimit të uzinës së ferrokromit në Elbasan dhe minierat e kromit të Përrenjasit e Pojskës, si dhe kontrata e koncesionit për rehabilitimin, operimin dhe transferimin e minierës së kromit Bulqizë, të fabrikës së pasurimit Bulqizë, të impiantit të seleksionimit dhe të uzinës së ferrokromit Burrel.

Vllahen Mining SHPK operon në fushën e xeheror-kromit në Has, Shqipëri.

Më datë 15 tetor 2021, shoqëritë Yildirim International Mining Investments B.V., dhe Balkan Finance Investment Group SHPK kanë nënshkruar “Marrëveshje për blerje aksionesh”, ku shitësi shtet aksionet e shoqërisë target e filialeve të zotëruara prej saj, dhe blerësi blen aksione me efekt që nga Data e Mbylljes së marrëveshjes.

Në përfundim të transaksionit, Yildirim International Mining Investments B.V. do të fitojë kontrollin direkt mbi shoqërinë Albchrome Holding SHPK dhe kontroll indirekt mbi Filialet e saj, shoqëritë Albchrome SHPK dhe Vllahen Holding SHPK, të cilat do të bëhen anëtare të Grupit Yildirim.

Transaksion plotëson kriteret e përcaktuara në nenin 10 dhe 12, të ligjit nr. 9121, datë 28.07.2003 “Për mbrojtjen e konkurrencës”, i ndryshuar dhe si i tillë kërkohet autorizimi nga Komisioni i Konkurrencës.

Vlerësimi i konkurrencës

Albchrome Holding SHPK është një shoqëri e angazhuar në biznesin e kontrollit të interesit në kapitalin e shoqërisë Albchrome SHPK, e cili operon në tregun e nxjerrjes e përpunimit të xeherorit të kromit dhe prodhimit të ferrokromit në uzinën e ferrokromit në Elbasan, Bulqizë e Burrel dhe shoqërisë Vllahen Mining SHPK, e cila operon në nxjerrjen e xeherorit të kromit në Has, Shqipëri.

Referuar nenit 3, pika 7, të ligjit nr. 9121, datë 28.07.2003 “Për mbrojtjen e konkurrencës”, i ndryshuar, si edhe Udhëzimit nr.76, datë 07.04.2008 “Për përcaktimin e tregut përkatës”, treg përkatës i produktit do të konsiderohet tregu i nxjerrjes dhe përpunimit të mineralit të kromit dhe tregu i prodhimit të ferrokromit. Treg përkatës gjeografik do të konsiderohet territori i Republikës së Shqipërisë.

Shqipëria zotëron pasuri të xeherorit të kromit dhe është prodhues i ferrokromit me karbon të lartë. Referuar të dhënave të Agjencisë Kombëtare të Burimeve Natyrore për vitin 2020, rezultoi se, janë pajisur me leje të shfrytëzimit të xeherorit të kromit 261 subjekte nga të cilat 77 nuk janë aktive dhe prodhimi nxjerrës i xeherorit të kromit për këtë vit ka qenë 626,627 ton nga të cilat shoqëria Albchrome SHPK ka realizuar një prodhim prej 100,817 ton metrik xeheror duke mbajtur 16.1 % të tregut të përgjithshëm të prodhimit të xeheror kromit.

Në tregun e prodhimit të ferrokromit, prodhimi i përgjithshëm për vitin 2020 ka qenë 53,544 ton nga të cilat 63.7% janë realizuar nga Albchrome SHPK, dhe pjesa tjetër nga i vetmi konkurrent në vend, GSA SHPK.

Në përgjithësi, Shqipëria është një lojtar i vogël në tregun global, me pjesë tregu 0.5-1% dhe duke qenë se tregu i brendshëm ka një nevojë të ulët për këtë produkt, minerali i kromit dhe prodhimi i ferrokromit eksportohen jashtë vendit.

Me përfundimin e Transaksionit, Grupi Yildirim do të bëhet indirekt pronar i 100% të pjesëmarrjes në kapitalin e shoqërisë Target dhe Filialeve të tij. Grupi Yildirim nuk është prezent në Shqipëri dhe transaksioni i propozuar do të mbajë të pandryshuar mjedisin aktual konkurrues.

Përqendrimi nuk do të krijojë mbivendosje ose marrëdhënie të rrjedhës së sipërme apo të poshtme midis aktiviteteve të palëve në nivel kombëtar dhe për këto arsye, transaksioni i synuar nuk do të sjellë asnjë ndryshim dhe nuk do të ketë asnjë ndikim në tregun shqiptar.

PËR KËTO ARSYE:

Komisioni i Konkurrencës, në bazë të nenit 24, shkronja d dhe nenit 56 pika 1 të ligjit nr. 9121, datë 28.07.2003 “Për mbrojtjen e konkurrencës”, i ndryshuar,

VENDOSI:

1. Të autorizojë përqendrimin e realizuar nëpërmjet përfutimit të kontrollit të shoqërisë Albchrome Holding SHPK dhe filialeve të saj nga shoqëria Yildirim International Mining Investments B.V.
2. Ngarkohet Sekretari i Përgjithshëm për njoftimin e palëve dhe dërgimin e vendimit pasi të bëhen pagesat që parashikon rregullorja “Për caktimin e shpenzimeve për ndjekjen e procedurave pranë Autoritetit të Konkurrencës”.

Ky vendim hyn në fuqi menjëherë.


KOMISIONI I KONKURRENCËS

Leida MATJA

Zv/Kryetar

Rezana KONOMI

Anëtar

Adriana BERBERI

Anëtar

Denar BIBA

Anëtar

Juliana LAFI

Kryetar

REPUBLICA E SHQIPËRIE
AUTORITETI I KONKURRENCËS